

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA

UREDBA
O NAČINU OSNIVANJA I UTVRĐIVANJU VISINE NAKNADE ZA RAD
RADNIH TIJELA KOJE OSNIVA VLADA KANTONA SARAJEVO I
RUKOVOДИОCI KANTONALNIH ORGANA DRŽAVNE SLUŽBE
(NACRT)

Obrađivač propisa:
Ministarstvo pravde i uprave

Sarajevo, april 2025. godine

Na osnovu člana 36. st. (1) i (2) Zakona o plaćama i naknadama u organima vlasti Kantona Sarajevo ("Službene novine Kantona Sarajevo", br. 5/19, 40/22 i 6/25) i čl. 26. i 28. stav 1. Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) Vlada Kantona Sarajevo, na ____ sjednici održanoj ____ 2025. godine, donijela je

(NACRT)

UREDBU

O NAČINU OSNIVANJA I UTVRĐIVANJU VISINE NAKNADE ZA RAD RADNIH TIJELA KOJE OSNIVA VLADA KANTONA SARAJEVO I RUKOVODIOCI KANTONALNIH ORGANA DRŽAVNE SLUŽBE

POGLAVLJE I - OSNOVNE ODREDBE

Član 1. **(Predmet)**

Ovom uredbom uređuje se način osnivanja radnih tijela koje osniva Vlada Kantona Sarajevo i radnih tijela kantonalnih ministarstava, kantonalnih uprava, kantonalnih upravnih organizacija, stručnih službi koje osniva Vlada Kantona Sarajevo (u daljem tekstu: radna tijela), kriteriji za ostvarivanje prava na naknadu za rad u radnim tijelima i visine naknada za rad u radnim tijelima, kao i naknade za rad državnih službenika, odnosno namještenika, koji vrše stručne i administrativno-tehničke poslove za potrebe radnih tijela, te izuzeća od primjene i način raspolaganja sredstvima za radna tijela koja se finansiraju od uplata fizičkih ili pravnih osoba.

Član 2. **(Radna tijela)**

(1) Radna tijela u smislu ove uredbe su:

- a) **Stalna radna tijela** Vlade Kantona Sarajevo (u daljem tekstu: stalna radna tijela Vlade), kao što su: savjeti, koordinacije, odbori, komisije, radne grupe i dr., koje osniva Vlada Kantona Sarajevo (u daljem tekstu: Vlada), u skladu sa čl. 19. i 20. Zakona o Vladi Kantona Sarajevo („Službene novine Kantona Sarajevo“, br. 36/14-Novi prečišćeni tekst, 37/14-Ispravka)(u daljem tekstu: Zakon o Vladi) i odgovarajućim odredbama Poslovnika o radu Vlade („Službene novine Kantona Sarajevo“, br. 23/23 22/24)(u daljem tekstu: Poslovnik Vlade), radi davanja prijedloga i mišljenja o pitanjima iz nadležnosti Vlade ili donošenja rješenja u upravnom postupku i odlučivanja o drugim pojedinačnim pitanjima iz nadležnosti Vlade, kao i radna tijela koja Vlada osniva u skladu s posebnim propisima ili obavezama utvrđenim međunarodnim sporazumima.
- b) **Povremena radna tijela** Vlade Kantona Sarajevo (u daljem tekstu: povremena radna tijela Vlade), koja osniva Vlada u skladu sa članom 19. stav 1. Zakona o Vladi i odgovarajućim odredbama Poslovnika Vlade, radi interresornog rada na pripremi radnih verzija zakona i podzakonskih propisa; izrade analiza na osnovu odgovarajućih podataka; davanja prijedloga i mišljenja o pitanjima iz nadležnosti Vlade, kao i

provođenja procedure za izbor i imenovanja iz nadležnosti Vlade u skladu sa posebnim zakonima.

- c) **Radna tijela kantonalnih organa državne službe i stručnih službi**, koja osniva rukovodilac kantonalnih organa državne službe ili rukovodilac stručne službe (u daljem tekstu: radna tijela kantonalnih organa i stručnih službi), po potrebi ili na osnovu posebnih propisa, kao povremena ili stalna radna tijela, a posebno radi:
- 1) provođenja procedura i predlaganja imenovanja odnosno postavljenja iz nadležnosti rukovodioca;
 - 2) provođenja redovnog godišnjeg popisa stalnih sredstava, obaveza i potraživanja;
 - 3) provođenja postupka javnih nabavki.
- (2) Radno tijelo iz stava (1) tačka c) ovog člana se može obrazovati samo za poslove i radne zadatke koji nisu u djelokrugu nijednog zaposlenog u kantonalnom organu državne službe kao i za poslove i radne zadatke za koje je posebnim zakonskim i podzakonskim aktima utvrđeno da ih obavlja posebno radno tijelo.
- (3) Izuzetno od stava (2) ovog člana, radno tijelo iz stava (1) tačka c) ovog člana se može obrazovati i za poslove i radne zadatke koji su u djelokrugu kantonalnog organa državne službe, kad se radi o izuzetno složenom zadatku koji ne mogu obaviti samo zaposleni u tom kantonalnom organu, bez saradnje drugih organa državne službe, drugih nivoa vlasti ili stručnjaka iz odgovarajuće oblasti. U tom slučaju radno tijelo radi u radnom vremenu i nema pravo na naknadu za svoj rad, izuzev članova radnog tijela koji nisu zaposleni u tom kantonalnom organu.

Član 3.

(Sastav i nadležnost radnih tijela)

- (1) Sastav i nadležnost stalnih radnih tijela Vlade propisuje se aktom o osnivanju radnog tijela.
- (2) Sastav i nadležnost povremenih radnih tijela Vlade propisuje se aktom o osnivanju radnog tijela.
- (3) Sastav i nadležnost radnih tijela kantonalnih organa i stručnih službi propisuje se aktom o osnivanju radnog tijela koji donosi rukovodilac kantonalnih organa državne službe ili stručne službe, u skladu sa posebnim propisom.
- (4) Članove radnih tijela iz st. (1) i (2) ovog člana, imenuje Vlada, iz reda članova Vlade ili iz reda izabranih nosilaca funkcija, savjetnika i državnih službenika, koje predlažu premijer Kantona Sarajevo ili rukovodioci kantonalnih organa državne službe i stručnih službi.
- (5) Članovi radnih tijela iz stava (2) ovog člana mogu biti predstavnici jednog ili više organa državne službe, kao i stručnjaci koji nisu u radnom odnosu u organima državne službe, a izabrani su zbog svoje stručnosti kao vanjski saradnici.
- (6) Članove radnih tijela iz stava (3) ovog člana imenuje rukovodilac kantonalnog organa državne službe ili stručne službe (u daljem tekstu: rukovodilac) rješenjem o osnivanju radnog tijela.
- (7) Broj članova radnih tijela iz člana 2. ove uredbe, ne može biti veći od pet, uključujući i predsjednika radnog tijela.
- (8) Izuzetno od stava (7) ovog člana, kada se radi o izuzetno složenom zadatku koji se ne može obaviti bez saradnje drugih organa državne službe, drugih nivoa vlasti ili stručnjaka iz odgovarajuće oblasti, kao i u slučajevima kada je broj članova određenog radnog tijela utvrđen posebnim propisom, radno tijelo može imati i veći broj članova, s tim da konačni broj članova mora biti neparan.

Član 4.

(Imenovanje sekretara radnih tijela)

- (1) Rješenjem o imenovanju članova stalnih radnih tijela Vlade, obavezno se određuju osobe koja će obavljati poslove sekretara radnog tijela, odnosno stručne i administrativno-tehničke poslove za potrebe radnog tijela.
- (2) Rješenjem o imenovanju članova povremenih radnih tijela Vlade i radnih tijela kantonalnih organa i stručnih službi mogu se odrediti osobe koje će obavljati stručne, odnosno administrativno- tehničke poslove za potrebe radnog tijela.

Član 5.

(Sadržaj akta o osnivanju radnog tijela)

- (1) Akt o osnivanju odnosno rješenje o imenovanju radnog tijela obvezno sadrži:
 - a) imena i prezimena predsjednika i članova radnog tijela,
 - b) naziv organa državne službe u kojem je predsjednik odnosno član radnog tijela uposlen, odnosno radno mjesto na koje je državni službenik ili namještenik raspoređen, ukoliko je radno tijelo sastavljeno od predstavnika samo jednog organa državne službe ili stručne službe,
 - c) rok u kojem radno tijelo treba obaviti zadatak i podnijeti ili podnositi izvještaj Vladi, odnosno rukovodiocu, te
 - d) ime, prezime i naziv radnog mjesta osobe koja će obavljati stručne, odnosno administrativno-tehničke poslove za potrebe radnog tijela, kao i
 - e) odredbu o pravu na naknadu za rad u skladu sa ovom uredbom.
- (2) Rok za obavljanje poslova i zadataka radnog tijela ne može biti duži od 90 dana, osim stalnih radnih tijela Vlade, obrazovanih u skladu sa u skladu sa čl. 19. i 20. Zakona o Vladi i odgovarajućim odredbama Poslovnika Vlade, kao i odredbama posebnih zakona i obavezama utvrđenim međunarodnim sporazumima.
- (3) Smatra se da su poslovi i zadaci Komisije izvršeni nakon prihvatanja izvještaja od strane Vlade ili rukovodioca koji je obrazovao radno tijelo, nakon čega organ koji je obrazovao radno tijelo donosi rješenje o utvrđivanju visine i isplati naknade za rad u radnom tijelu.

Član 6.

(Izvještaj)

Izvještaj o radu radnog tijela, u zavisnosti od vrste zadataka radi kojeg je radno tijelo osnovano, obvezno sadrži sljedeće elemente:

- a) informaciju, analizu, izvještaj ili mišljenje radi kojeg je radno tijelo osnovano;
- b) radnu verziju propisa ili strategije, pripremljene u skladu sa aktom o osnivanju radnog tijela;
- c) broj donesenih rješenja i drugih pravnih akata iz nadležnosti radnog tijela ili utvrđenih prijedloga rješenja za Vladu ili rukovodioca u skladu sa aktom o osnivanju radnog tijela;
- d) izvještaj o provedenoj proceduri za izbor i imenovanje ili postavljenje, u propisanoj formi, u skladu sa aktom o osnivanju radnog tijela;
- e) zapisnike - podatke o broju i vremenu održanih sjednica radnog tijela, uključujući i podatke o broju prekovremenih sati ili sati rada u dane vikenda ili praznika, kao i podatke o prisustvu članova radnog tijela sjednicama i osoba koja obavljaju stručne, odnosno administrativno-tehničke poslove za potrebe radnog tijela;
- f) podatke o broju i vremenu prekovremenih sati ili sati rada u dane vikenda ili praznika, radi pripreme sjednica radnog tijela.

Član 7.
(Podnošenje izvještaja)

Izvještaje iz člana 6. ove uredbe podnose predsjednici radnih tijela, i to:

- a) za stalna radna tijela Vlade, osnovana aktom Vlade Kantona Sarajevo na prijedlog Premijera Kantona Sarajevo – mjesečno sekretaru Vlade, najkasnije do 5. radnog dana narednog mjeseca u odnosu na mjesec za koji se podnosi izvještaj, a godišnje – Vladi, najkasnije do 15. januara naredne godine za prethodnu godinu;
- b) za stalna radna tijela Vlade osnovana aktom Vlade u skladu sa posebnim zakonom, međunarodnom sporazumu ili podzakonskim aktom, na prijedlog rukovodioca resornog kantolnog organa ili stručne službe – mjesečno ili kvartalno ili polugodišnje – rukovodiocu resornog kantonalnog organa ili službe, najkasnije do 5. radnog dana narednog mjeseca u odnosu na mjesec ili kvartal ili polugodište za koji se podnosi izvještaj, a godišnje - Vladi, najkasnije do 15. januara naredne godine za prethodnu godinu;
- c) za povremena radna tijela Vlade, po okončanju zadatka radi kojeg je radno tijelo osnovano - Vladi;
- d) za stalna radna tijela kantonalnih organa i stručnih službi - mjesečno rukovodiocu, najkasnije do 5. radnog dana narednog mjeseca u odnosu na mjesec za koji se podnosi izvještaj, a godišnje - rukovodiocu, najkasnije do 15. januara naredne godine za prethodnu godinu;
- e) za povremena radna tijela kantonalnih organa i stručnih službi, po okončanju zadatka radi kojeg je radno tijelo osnovano - rukovodiocu.

POGLAVLJE II - PRAVO NA NAKNADU ZA RAD I NAČIN UTVRĐIVANJA VISINE NAKNADE ZA RAD

Član 8.
(Pravo na naknadu)

- (1) Za sudjelovanje u radu radnih tijela, članovima radnih tijela pripada naknada samo pod uslovom da su zadatke za koje su zaduženi aktom o osnivanju radnog tijela obavljali izvan redovnog radnog vremena.
- (2) Izuzetno od stava (1) ovog člana, radna tijela zadužena za provedbu redovnog godišnjeg popisa stalnih sredstava, obaveza i potraživanja mogu raditi i u redovnom radnom vremenu ali samo na poslovima utvrđivanja stvarnog stanja i tada im pripada naknada za rad.

Član 9.
(Kriteriji za utvrđivanje visine naknade)

- (1) Kriteriji za utvrđivanje visine naknade članovima radnog tijela su:
 - a) složenost oblasti za koju se obrazuje radno tijelo,
 - b) potrebna stručnost,
 - c) broj završenih predmeta,
 - d) potreba praktičnog rada na terenu,
 - e) obuhvat različitih oblasti,
 - f) obim poslova i zadataka,
 - g) precizno određeni rokovi za izvršenje poslova i zadataka, i
 - h) broj održanih sjednica stalne komisije Vlade, uz uslov da se održi najmanje jedna sjednica mjesečno.

- (2) Članovi radnih tijela iz člana 2. ove uredbe ostvaruju naknadu samo pod uslovom da su poslove i radne zadatke za koje su zaduženi aktom o osnivanju radnog tijela obavljali poslije redovnog radnog vremena, što se dokazuje zapisnikom.

Član 10.

(Visina naknade za rad)

- (1) Članovi radnih tijela iz člana 2. ove uredbe koje osniva Vlada, odnosno rukovodilac, kada poslove kao članovi radnih tijela obavljaju izvan radnog vremena, imaju pravo na maksimalnu mjesečnu naknadu za rad u radnom tijelu do visine jedne i pol (1,5) osnovice iz člana 5. Zakona o plaćama i naknadama u organima vlasti Kantona Sarajevo ("Službene novine Kantona Sarajevo", br. 5/19, 40/22 i 6/25).
- (2) Tačan iznos odnosno visinu naknade za rad u radnom tijelu iz člana 2. ove uredbe, svojim aktom utvrđuje Vlada, odnosno rukovodilac, za svako pojedinačno radno tijelo.
- (3) Naknada se isplaćuje po izvršenom zadatku i isključuje pravo na prekovremeni rad.
- (4) Izuzetno od stava (3) ovog člana, naknada za rad u radnim tijela iz člana 2. ove uredbe ne isključuje pravo na prekovremeni rad ostvaren po drugim osnovama u skladu sa odredbama Zakona o radu („Službene novine Federacije Bosne i Hercegovine“, br. 26/16, 89/18, 44/22 i 39/24).
- (5) Naknade za rad u radnim tijelima iz stava (1) ovog člana, a koje se finansiraju od uplata fizičkih ili pravnih lica, ne ulaze u ograničenje iz stava (1) ovog člana.
- (6) Sekretaru radnog tijela, odnosno osobama koje vrše poslove stručne i administrativno-tehničke poslove za potrebe radnog tijela pripada pravo na naknadu u visini od 70% od visine naknade za člana radnog tijela.

POGLAVLJE III – SREDSTVA ZA ISPLATU NAKNADA ZA RAD I IZVJEŠTAVANJE O KORIŠTENJU SREDSTAVA ZA RAD RADNIH TIJELA

Član 11.

(Isplata naknada za rad)

- (1) Naknade za rad iz člana 10. ove uredbe isplaćuju se:
- a) za članove stalnih radnih tijela Vlade, osnovana aktom Vlade, na prijedlog Premijera Kantona – iz sredstava Kabineta premijera ili iz sredstava organa državne službe ili stručne službe, na čiji je prijedlog osoba imenovana za člana radnog tijela, a za stručnjake iz svoje oblasti kao vanjske članove, iz sredstava organa na čiji prijedlog je osoba imenovana, što se precizira aktom o osnivanju svakog radnog tijela pojedinačno;
 - b) za članove stalnih radnih tijela Vlade koja su osnovana na prijedlog rukovodioca resornog kantonalnog organa državne službe ili stručne službe – iz sredstava resornog kantonalnog organa državne službe ili stručne službe ili iz sredstava organa državne službe ili stručne službe, na čiji je prijedlog osoba imenovana za člana radnog tijela, a za stručnjake iz svoje oblasti kao vanjske članove, iz sredstava organa na čiji prijedlog je osoba imenovana, što se precizira aktom o osnivanju svakog radnog tijela pojedinačno;
 - c) za članove povremenih radnih tijela Vlade – iz sredstava organa državne službe ili stručne službe, na čiji je prijedlog osoba imenovana za člana radnog tijela, a za stručnjake iz svoje oblasti, kao vanjske članove – iz sredstava organa na čiji je prijedlog osnovano povremeno radno tijelo Vlade;
 - d) za članove koordinacionih tijela na nivou Kantona Sarajevo, Federacije Bosne i Hercegovine i Bosne i Hercegovine, kao članove implementacionih timova projekata

- koji se realiziraju na nivou Kantona Sarajevo, Federacije Bosne i Hercegovine i Bosne i Hercegovine - iz sredstava organa državne službe ili stručne službe, na čiji je prijedlog osoba imenovana za člana radnog tijela;
- e) za članove radnih tijela kantonalnih organa i stručnih službi – iz sredstava organa državne službe ili stručne službe.
- (2) Naknade za rad sekretara stalnih radnih tijela, odnosno osoba koje vrše stručne i administrativno-tehničke poslove za potrebe stalnih i povremenih radnih tijela Vlade, isplaćuju se iz sredstava Kabineta Premijera, odnosno iz sredstava resornog kantonalnog organa državne službe ili stručne službe na čiji je prijedlog radno tijelo osnovano, odnosno sredstava organa državne službe ili stručne službe u kojoj je osoba uposlena, a naknade osobama koja te poslove vrše za radna tijela kantonalnih organa i stručnih službi, iz sredstava kantonalnog organa državne službe ili stručne službe.

Član 12.

(Dostava tromjesečnih izvještaja)

- (1) Sekretar Vlade i rukovodioci kantonalnih organa i stručnih službi, dužni su Ministarstvu finansija dostavljati tromjesečne izvještaje o visini isplaćenih naknada za članove radnih tijela na koje se ova uredba primjenjuje.
- (2) Izvještaj iz stava (1) ovog člana sadrži tabelarni pregled članova svih radnih tijela, sa podacima o osnivačkom aktu, podacima o rješenju o imenovanju i rješenju o isplati naknada za rad.

Član 13.

(Dostava izvještaja Vladi)

Ministarstvo finansija dostavlja Vladi tromjesečne izvještaje o visini isplaćenih naknada za članove radnih tijela na koje se ova uredba primjenjuje.

Član 14.

(Izuzeci)

- (1) Ova uredba ne primjenjuje se na radna tijela ili komisije čije je obrazovanje regulisano posebnim zakonima i drugim propisima, a finansiraju se iz sredstava koja uplaćuju korisnici usluga radnog tijela ili komisije.

POGLAVLJE IV – PRELAZNE I ZAVRŠNE ODREDBE

Član 15.

(Usklađivanje postojećih akata o imenovanju radnih tijela)

- (1) Osnivački akti, odnosno rješenja o imenovanju radnih tijela iz člana 2. ove uredbe uskladit će se sa odredbama ove uredbe u roku od 30 dana od dana stupanja na snagu ove uredbe.
- (2) Rješenja o naknadama za rad članova radnih tijela, stručnih i tehničkih osoba koja su donesena do dana stupanja na snagu ove Uredbe, realizirat će se u skladu sa propisima koji su važili do dana stupanja na snagu ove uredbe.

Član 16.

(Prestanak važenja ranijih akata)

Stupanjem na snagu ove uredbe prestaje da važi Odluka o načinu obrazovanja i utvrđivanja visine naknade za rad radnih tijela koje obrazuje Vlada Kantona Sarajevo i rukovodioci kantonalnih organa državne službe ("Službene novine Kantona Sarajevo", broj 18/20).

Član 17.
(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj:
Datum:

PREMIJER

Nihad Uk

Dostaviti:

1. Predsjedavajući Skupštine Kantona;
2. Zamjenici predsjedavajućeg Skupštine (3x);
3. Premijer Kantona;
4. Ministarstvo pravde i uprave;
5. Za objavu u „Službenim novinama Kantona Sarajevo“;
6. Evidencija;
7. Arhiva.

O B R A Z L O Ž E N J E

I – PRAVNI OSNOV

Pravni osnov za donošenje ove uredbe sadržan je u članu 36. st. (1) i (2) Zakona o plaćama i naknadama vlasti Kantona Sarajevo („Službene novine Kantona Sarajevo“, br. 5/19, 40/22 i 06/25) kojim je utvrđeno da se propisom Vlade Kantona reguliše način i uslovi obrazovanja komisija i način ostvarivanja naknade, a tačan iznos odnosno visinu naknade za rad svojim aktom utvrđuje Vlada Kantona, odnosno rukovodilac organa državne službe, za svaku pojedinačnu komisiju i čl. 26. i 28. stav 1. kojim je propisano da Vlada, iz svoje nadležnosti, donosi uredbe kojim se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

II – RAZLOZI ZA DONOŠENJE

Zaključkom Vlade Kantona Sarajevo, broj 02-04-50995-62.6/23 od 07.12.2023. godine zaduženo je Ministarstvo pravde i uprave da analizira odredbe Odluke o načinu obrazovanja i utvrđivanja visine naknade za rad radnih tijela koje obrazuje Vlada Kantona Sarajevo i rukovodioci kantonalnih organa državne službe ("Službene novine Kantona Sarajevo", broj 18/20) i Zakona o suzbijanju i prevenciji korupcije u Kantonu Sarajevo („Službene novine Kantona Sarajevo“, br. 35/22, 42/22 i 55/22), te da Vladi Kantona Sarajevo predloži izmjene i dopune navedene Odluke, odnosno da dostavi prijedlog akta kojim bi se uredile eventualne neusaglašenosti sa odredbama citiranog Zakona.

S tim u vezi, Ministarstvo pravde i uprave je izvršilo analizu navedene Odluke i Zakona, kao i Zakona o plaćama i naknadama u organima vlasti Kantona Sarajevo koji je pravni osnov za donošenje predmetne Odluke.

Po okončanoj analizi, a s ciljem otklanjanja neusaglašenosti i otklanjanja problema u primjeni, Ministarstvo pravde i uprave je zaključilo da je neophodno promijeniti vrstu akta kojim se uređuje pitanje obrazovanja i utvrđivanja visine naknade za rad radnih tijela koje obrazuje Vlada i rukovodioci u Zakonu o plaćama i naknadama u organima vlasti Kantona Sarajevo, na način da se navedena odluka zamjeni propisom jače pravne snage (uredbom) s obzirom na vrstu materije koja će se predmetnim propisom urediti.

Nadalje, Ured za reviziju institucija u FBiH u Izvještaju o finansijskoj reviziji Kantona Sarajevo za 2023. godinu dao je preporuku Vladi Kantona Sarajevo, da u saradnji sa Ministarstvom pravde i uprave i Ministarstvom finansija, utvrdi formu, sadržaj, te način i rok dostavljanja tromjesečnih izvještaja o visini isplaćenih naknada za članove komisija, te uspostavi nadzor nad izdacima za rad komisija. S ciljem implementacije predmetne preporuke precizirane su odredbe koje se odnose na izvještavanje.

S obzirom da je Skupština Kantona Sarajevo donijela Zakon o izmjenama i dopuni Zakona o plaćama i naknadama u organima vlasti Kantona Sarajevo („Službene novine Kantona Sarajevo“, broj 6/25), gdje je član 36. izmjenjen na način da se umjesto odlukom, sada propisom uređuje pitanje obrazovanja i utvrđivanja visine naknade za rad radnih tijela koje obrazuje Vlada i rukovodioci, Ministarstvo pravde i uprave je, kao obrađivač akta, pripremilo nacrt Uredbe o načinu osnivanja i utvrđivanju visine naknade za rad radnih tijela koje osniva Vlada Kantona Sarajevo i rukovodioci kantonalnih organa državne službe.

III – PRAVNA RJEŠENJA

Član 1. – Ovim članom uređuje se predmet uredbe, način osnivanja radnih tijela koje osniva Vlada Kantona Sarajevo i radnih tijela kantonalnih ministarstava, kantonalnih uprava, kantonalnih upravnih organizacija, stručnih službi koje osniva Vlada Kantona Sarajevo,

kriteriji za ostvarivanje prava na naknadu za rad u radnim tijelima i visine naknade za rad u radnim tijelima, kao i naknade za rad državnih službenika, odnosno namještenika, koji vrše stručne i administrativno-tehničke poslove za potrebe radnih tijela, te izuzeća od primjene i način raspolaganja sredstvima za radna tijela koja se finansiraju od uplata fizičkih ili pravnih osoba.

Član 2. – Ovim članom popisuje se vrste radnih tijela (stalna i povremena radna tijela Vlade i radna tijela koje obrazuju rukovodioci kantonalnih organa državne službe i stručnih službi koje osniva Vlada).

Član 3. – Ovim članom se propisuje sastav i nadležnost radnih tijela iz člana 2.

Član 4. – Ovim članom se propisuje imenovanje sekretara radnih tijela i lica koja vrše administrativno-tehničke poslove.

Član 5. – Ovim članom se propisuje sadržaj akta o osnivanju radnih tijela kao i rok za izvršenje zadataka radnih tijela.

Član 6. – Ovim članom se propisuje sadržaj izvještaja.

Član 7. – Ovim članom se precizira kojem organu i u kojem roku se podnosi izvještaj.

Član 8. – Ovim članom se propisuje ko ima pravo na naknadu za radu radnim tijelima i pod kojim uslovima.

Član 9. – Ovim članom se propisuju kriteriji za utvrđivanje visine naknade za rad radnih tijela.

Član 10. – Ovim članom se propisuje maksimalna visina naknade koja se može utvrditi za radnih tijela.

Član 11. – Ovim članom se propisuje na čiji teret organa pada obaveza isplate naknade za rad članova radnih tijela.

Član 12. – Ovim članom se propisuje obaveza tromjesečnog izvještavanja o utrošku sredstava za rad radnih tijela koje osniva Vlada i rukovodioci.

Član 13. – Ovim članom se propisuje obaveza Ministarstvu finansija da dostavlja Vladi tromjesečne izvještaje o isplatama naknada za rad radnih tijela.

Član 14. – Ovim članom se propisuju izuzeci od primjene odredbi ove uredbe.

Član 15. – Ovim članom se propisuje obaveza usklađivanja postojećih akata o osnivanju radnih tijela u roku od 30 dana.

Član 16. – Ovim članom se propisuje prestanak važenja ranije Odluke.

Član 17. – Ovim članom se propisuje stupanje na snagu ove uredbe.

IV – FINANSIJSKA SREDSTVA

Za provođenje ove uredbe nisu potrebna dodatna finansijska sredstva iz Budžeta Kantona Sarajevo.

PRILOZI

ZAKON O PLAĆAMA I NAKNADAMA U ORGANIMA VLASTI KANTONA SARAJEVO („Službene novine Kantona Sarajevo“, br. 5/19, 40/22 i 6/25)

Član 36.

(Naknada za rad u komisijama) -kompilirani tekst-

(1) Članovi komisija koje se formiraju na osnovu rješenja Vlade Kantona odnosno rukovodioca organa uprave, kada poslove kao član komisije obavlja izvan radnog vremena, imaju pravo na maksimalnu mjesečnu naknadu za rad u komisijama do visine jedne i pol (1,5) osnovice iz člana 5. ovog zakona.

(2) **Propisom** Vlade Kantona reguliše se način i uslovi obrazovanja komisija i način ostvarivanja naknade, a tačan iznos odnosno visinu naknade za rad svojim aktom utvrđuje Vlada Kantona, odnosno rukovodilac organa državne službe, za svaku pojedinačnu komisiju.

(3) Naknade za rad u komisijama iz stava (1) ovog člana, a koje se finansiraju od uplata fizičkih ili pravnih lica, ne ulaze u ograničenje iz stava (1) ovog člana.

ZAKON O VLADI KANTONA SARAJEVO („Službene novine Kantona Sarajevo“, broj 36/14-Novi prečišćeni tekst i broj 37/14)

Član 26.

Vlada Kantona u ostvarivanju svojih nadležnosti utvrđenih ustavom donosi uredbе, odluke, rješenja i zaključke.

Član 28.

Uredbom se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa ili organizacija i odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade Kantona.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi Kantona i određuju zadaci organima uprave i službama, kao i radnim tijelima Vlade Kantona. Zaključkom se odlučuje i u drugim slučajevima u kojima se ne donose druga akta.

